

A Consellería de Cultura, Lingua e Xuventude, a través da Dirección Xeral de Xuventude, presenta o programa de axudas á emancipación da mocidade Bono emancípate, cuxa convocatoria publícase no *Diario Oficial de Galicia* do 28 de xaneiro de 2025 (https://www.xunta.gal/dog/Publicados/2025/20250128/AnuncioG0766-030125-0003_gl.html)

Esta orde ten por obxecto establecer os requisitos e o procedemento de concesión dunha axuda económica destinada ás persoas mozas traballadoras que aluguen ou adquiren en propiedade unha vivenda, para contribuír a sufragar os gastos derivados da súa emancipación nunha vivenda distinta da dos/das seus/súas proxenitores/as, que non sexan os do prezo de adquisición ou da renda de alugueiro, como son os derivados dunha mudanza, a adquisición de mobiliario e artigos de decoración en xeral, electrodomésticos, enxoval de cociña e baño, téxtil de fogar e gastos de xestoría ou notaría.

A axuda farase efectiva a través dunha tarxeta virtual, a cal só poderá ser utilizada en establecementos de venda de mobiliario, de electrodomésticos, tendas de decoración e outros establecementos especializados, grandes superficies, empresas de mudanzas, xestorías e notarías, que teñan establecemento aberto no territorio da Comunidade Autónoma de Galicia, para os gastos incluídos no artigo 7 da orde. Esta tarxeta non poderá ser utilizada en compras a distancia.

Persoas beneficiarias

Poderán beneficiarse desta axuda as persoas físicas maiores de idade que reúnan unha serie de requisitos, que se indican no artigo 5, como son **ter menos de 36 anos de idade; dispoñer de, polo menos, unha fonte regular de ingresos na data da solicitude;** non superar os umbrais de ingresos que establece a orde; **ser titular na Comunidade Autónoma de Galicia, en calidade de persoa arrendataria, dun contrato de alugamento de vivenda que teña unha duración mínima dun ano, ou ter subscrito como adquirente unha escritura pública de compravenda dunha vivenda,** con posterioridade ao 31 de maio de 2024, entre outros.

Actividade subvencionable e contía da axuda

Mediante esta orde subvenciónase a través do Bono Emancípate, nos establecementos de venda de mobiliario, de electrodomésticos, tendas de decoración e outros establecementos especializados, grandes superficies, empresas de mudanzas, xestorías e notarías, que teñan establecemento aberto no territorio da Comunidade Autónoma de Galicia, a adquisición dos bens e servizos que se indican no artigo 7.

- Mobles de salón/comedor: sofá, mesa de comedor, cadeira/s, lámpada de pé ou de teito, mesa auxiliar, moble de TV, estante.

- Mobles de cuarto: cabeceiro, estrutura de cama, somier, colchón, amofada, aparador, armario, lámpada de pé ou de teito, mesa auxiliar.

- Mobles de cociña: mesa, cadeira/s, estante, lámpada de teito.

- Mobles de baño: estante, moble de lavabo, cadeira, biombo ou cortina de ducha.



- Electrodomésticos: forno convencional, forno microondas, lavadora, secadora, frigorífico, deshumidificador, radiador.
- Artigos de decoración: cadros, porta retratos, testos, plantas, alfombras, espellos, floreiros.
- Enxoval de cociña: potas, cazos, tixolas e similares, vaixela, cubertos e outros utensilios.
- Enxoval de baño: xaboeira, porta cepillos e similares, espello de aumento.
- Têxtil de fogar: sabas, edredóns, toallas, mantas.
- Gastos de mudanza: os derivados do servizo de traslado de mobiliario e aveños dende unha vivenda anterior ata aquela alugada ou adquirida que da dereito ao cobro da axuda.
- Gastos de xestoría e notaría: os honorarios que aplique a xestoría ou a notaría polas xestións derivadas dos contratos de arrendamento ou de compravenda que dan dereito ao cobro desta axuda.

No caso dos electrodomésticos só se poderá adquirir unha unidade de cada tipo.

No caso de enxoval de cociña e baño, poden adquirirse cada tipo de produto individualmente ou como un xogo.

Os produtos e servizos subvencionados serán aqueles que se adquiran desde a data da activación da tarxeta polas persoas beneficiarias ata o 31 de decembro de 2025.

A contía total da axuda é de 1.500 € para as persoas mozas que, reunindo os requisitos establecidos nestas bases, soliciten a axuda na súa condición de arrendatarias dunha vivenda diferente da dos/das seus/súas proxenitores/as, **e de 3.000 € para as que teñan adquirido unha vivenda en propiedade**, con posterioridade ao 31 de maio de 2024 e en todo caso antes da data de remate do prazo de solicitudes.

Solicitudes e prazo

O prazo de presentación de solicitudes iniciarase o día 6 de febreiro de 2025 e estará aberto ata o día 30 de abril de 2025, ambos incluídos, salvo que se produza con anterioridade o esgotamento do crédito orzamentario dispoñible, caso en que se observará o disposto no artigo 3.2 (orde de prioridade de data e hora de entrada).